



Leksyon 10

"ANG IMONG KAUGMAON"

1. Paghingalan ug pipila ka mga ilhanan nga matud pa ni Jesus, manghitabo sa dili pa ang iyang pagbalik.
 - Si Jesus nagaingon nga sa hapit na gayud siya mobalik, mosamot ang pagkadautan sa mga katawhan, ug molabi pa gayud ang paghigugma nila sa mga butang niining kalibutan. Manungha unya ang mga mag-pakristo-kristo ug mga mini nga mga profeta, ng manghitabo ang mga dagkong linog, gutom, ug mga kamatay. Ug aduna unya'y mga gubat, ug mga dungog-dungog sa mga gubat. Kining maeng mga ilhanan makita sa Mateo capitulo 24 ug Lukas capitulo 21.

2. Aduna ba kitay kasayuran sa tukma nga panahon sa pagbalik sa Ginoo?

- Wala. Dili nato masayran ang tukma nga panahon sa pagbalik sa Ginoo.

Mateo 24:36. “Apan mahitungod sa adlaw ug takna, walay usa nga masayud, bisan pa ang Anak o manulonda gawas sa Amahan lamang.

3. Unsa ang dangatan sa mga matuod nga Cristohanon inigbalik ni Jesus?

- Ang mga matuod nga Cristohanon nga nangamatay mabuhi pagusab ug sila nga nangabilin nga buhi pa, manga-usab. Ug unya ang tanan pagabayawon ug motabo sa Ginoo diha sa mga panganod.

1 Cor. 15:51, 53. Ania karon, isulti ko kaninyo ang usa ka tinago. Dili kitang tanan mangamatay apan kitang tanan manga-usab sa kalit sa usa ka pagpamilok, inigtingog na sa katapusang trumpeta. Kay ang trumpeta pagapatunggon, ug ang mga patay pagabanhawon nga may mga lawas nga dili na madunot, ug kita manga-usab, kay kining lawas nga madunot ra pagailisan unyag dili na madunot ug kining lawas nga mamatay ra pagailisan unyag dili na mamatay.

1 Tesalonica 4:13, 15. Apan dili among tinguha, mga igsoon, nga kamo dili mahibalo mahitungod kanila nga mga nanga-

matay, aron dili kamo managsubo ingon sa uban nga walay paglaum. Kay kini among ipahayag kaninyo sumala sa pulong sa Ginoo, nga kitang mga buhi nga magapabilin pa hangtud sa pag-abot sa Ginoo, dili kita maga-una kanila nga mga nangamatay.

1 Tesalonica 4:16,17. Kay ang Ginoo gayud mao ang manaug unya gikan sa langit inubanan ug singgit sa pagsugo ug sa tawag sa punoan sa mga manulonda, ug sa tingog sa trumpeta sa Dios. Ug unya ang mga nangamatay diha kang Cristo mouna sa pagpamangon ug kita nga mga buhi pa nga mahabilin, pagasakgawon ngadto sa Ginoo diha sa kawangan; ug sa ingon niini kita magapakiguban na sa Ginoo sa tanang panahon.

4. Unsa ang manghitabo sa mga Cristohanon tapus sila sakgawon sa pagtabo sa Ginoo?

- Ang mga Cristohanon pagahukman sumala sa ilang pagkamaminatud-on kang Cristo. Ug sila manga-on sa panihapon sa kasal sa Cordero. Kini manghitabo unya kon dawaton na sa Cordero sa Dios ang Iglesia ingon nga iyang pangasaw-onon, ngadto sa iyang panimalay.

2 Corinto 5:10. Kay kitang tanan kinahanglan magapangatubang sa hukmanan ni Cristo, aron ang matag-usa magadawat

sumala sa nabuhat sa iyang lawas, maayo o dautan.

Pinadayag 19:7, 9. Managhugyaw ug ihatag ta kaniya ang himaya, kay ang kasal sa Cordero nahiabut na, ug ang iyang pangasaw-onon nakaandam na sa iyang kaugalingon: Ug sa pangasaw-onon gitugot ang pagbiste ug lino nga manipis, masidlakon ug maputli. (Kay ang lino nga manipis mao man ang mga matarung bi-binuhatan sa mga balaan) Ug ang manulonda miingon kanako, "Isulat mo kini: Bulahan ang mga gipangdapit ug adto sa panihapon sa kasal sa Cordero. Ug siya miingon kanako, "Kini maoy tinuod nga mga pulong sa Dios."

5. Mobalik ba si Jesus dinhi sa yuta aron sa paghari?

- Si Jesus mobalik kauban sa iyang mga manulonda ug kauban sa iyang mga katawhan aron magahari ibabaw sa tibook nga yuta sulod sa usa ka libo nga tuig.

Judas 14. Tan-awa! Ang Ginoo nahiabut uban sa iyang mga balaang mga panon.

Pinadayag 20:6. Bulahan ug balaan ang tawo nga nakaambit sa nahaunang pagkabanhaw; sa mga tawong nga niini ang ikaduhang kamatayon walay gahum sa pagbuot, hinono-a sila mahimong mga sacerdote sa Dios ug ni Cristo ug uban kaniya magahari sila sa usa ka libo ka tuig.

6. Unsa ang manghitabo tapus molabay ang usa ka libo ka tuig nga paghari ni Cristo?

- Ang mga dautan nga mga nangamatay, mangabuhi pag-usab aron pagahukman sa Dios. Ug si satanas ug ang iyang mga manulonda, ug ang tanang mga dautan igatambog ngadto sa infierno. Mao kini ang ginatawag ug pagpanghukom atubangan sa Dakung Trono Nga Maputi.

Pinadayag 20:11, 14. Ug unya nakita ko ang usa ka dakung trono nga maputi ug ang naglingkod niini, gikan sa kang kansang atubangan ang yuta ug ang langitang nanagpangalagiw, ug walay dapit nga hingkaplagan alang kanila. Ug nakita ko ang mga patay nga dagku ug mga gagmay, nga nanagtindog sa atubangan sa trono, ug dihay nga basahon nga gipanghukman pinasikad sa nahisulat diha sa mga basahon, pinasikad sa ilang mga binuhatan. Ug ang dagat mitugyan sa mga patay nga diha niini, ang kamatayon ug ang Hades mitugyan sa mga patay nga diha kanila, ug ang tanan gipanghukman pinasikad sa ilang binuhatan. Unya ang kamatayon ug ang Hades gitambog ngadto sa linaw nga kalayo. Mao kini ang ikaduhang kamatayon. Ang linaw nga kalayo.

Pinadayag 20:15. Ug kon ang ngalan ni bisan kinsa dili makaplagan diha sa basahon sa kinabuhi, siya itambog ngadto sa linaw nga kalayo.

7. Unsa ang manghitabo sa mga anak sa Dios tapus ang pagpanghukom atubangan sa dakung trono nga maputi?

- Ang mga anak sa Dios magapuyo kauban kaniya sa walay katapusan.

Pinadayag 21:2, 3. Ug nakita ko balaang siyudad ang bag-ong Jerusalem, nga nanaug gikan sa langit gikan sa Dios, gitagana maingon sa usa ka pangasawonon nga gidayan-dayanan alang sa iyang pamanhonon. Ug nadungog ko gikan sa trono ang usa ka dakung tingog nga nag-ingon, "Tan-awa ang puloy-anan sa Dios anan uban sa mga tawo". Siya magapuyo ipon kanila ug sila mahimong iyang kawatuhan, ug ang Dios gayud mao ang magpakig-uban kanila ug mahimong ilang Dios.

Pinadayag 21:4. "Ug iyang pagapahiran ang tanang luha gikan sa ilang mga mata, ug ang kamatayon wala na ug wala na usab unyay pagminatay, ni paghilak, ni kasakit, kay ang unang mga butang nangagi na".

ANG IMONG PAGABUHATON

1. Basaha ang Mateo capitulo 24, ug Lukas capitulo 21.
2. Kasagaran sa mga tawo, adunay kaikag sa paghisgut o pagpanudlo mahitungod sa mga panagna. Suginli ang imong mga higala mahitungod sa imong nakat-onan niining leksyona. Labing maayo nga unahan mo sa paghisgut ang usa ka higala nga Cristohanon.
3. Kon nasag-ulo na nimo pag-ayo ang mga sag-ulohon, tubaga ang imong mga pangutana sa Talaan sa Tinun-an alang sa ika-napulong leksyon.